

monstrant, adeo non fuisse Monothelico errore infectum, ut potius disertis eum errorem verbis proscripserit. Quamobrem hinc inde sedulo libratis omnibus, quæ hactenus sive pro Honorio, sive contra Honorium allata sunt, rationum momentis, in eam sententiam libens ire censui, quam olim, edita luculentissima Apologia, tradidere Auctores omni exceptione majores, Johannes Quartus Romanus Pontifex, & Sanctus Maximus, Abbas, & Martyr, atque Monothelitarum flagellum.

Patere igitur, SANCTISSIME PATER, ut quæ me potissimum ad id de illibata Honorii fide affirmandum perpulere rationes, integerrimo supremoque Sanctitatis Tuæ judicio subjiciam. *Decessor meus* (ita (1) de Honorio scribit Johannes IV., ipsius olim amanuensis, postea in Sede Apostolica Successor:) *Decessor meus docens de mysterio Incarnationis Christi, dicebat, non fuisse in eo, sicut in nobis peccatoribus, mentis & carnis*

(1) In Epist. ad Constantium Imperat. Heraclii filium. Tom. vi. Concil. Labb. Edit. Venet. anni 1729. pag. 1514.